

**Date – 09/12/2025**  
**Time - 7:30 -7:40 Hrs**  
**AKASHVANI AIZAWL**

## REGIONAL NEWS BULLETIN

### HEADLINES (MORNING)

1. LADC Inthlanpui neiha vote tlate chu tukin zing dar 8 atang hian Government Lawngtlai College-a Counting Hall-ah chhiar a ni dawn a, vote chhiar turin inbuatsaihna peihfel a ni tawh.
2. Urban Development & Poverty Alleviation (UD&PA) MINISTER Pu K. Sapdanga chuan, nimin khan Aizawl Smart City Ltd. (ASCL) hmalaknaa din ‘Aizawl Sumtual’, MINECO hmun ami chu a hawng.
3. Union Minister of State for Minority Affairs George Kurian chuan sawrkarin ramchhunga hnam leh sakhawm tlem zawk minority te hamthatna tur scheme tam tak a siam tih a sawi.
4. President Draupadi Murmu-i chuan vawiinah kut themthiam lama thawk tha te hnenah Handicrafts Award a sem dawn.

<><><>

### LADC COUNTING

LADC Inthlanpui neiha vote tlate chu tukin zing dar 8 atang hian Government Lawngtlai College-a Counting Hall-ah chhiar a ni dawn a, vote chhiar turin inbuatsaihna peihfel a ni tawh.

Counting Hall-a pindan pathumah Vote tlate hi dawhkan 21-ah chhiar a ni dawn a, Tuichhaklam Sangau RD Block huamchhunga MDC bial 9 chu Pindan pakhata dawhkan 5-ah chhiar a ni dawn a, Lawngtlai leh a chhehvel bial 8 awmin dawhkan 8-ah chhiar a ni anga, Tuithlanglam bial 8 chu dawhkan 8-ah chhiar a ni ang.

Ruahmanlawk dan chuan tumkhatah Pindan pathumah bial 3 zel chhiar a ni dawn a, Pindan pakhatah bial khat chu vawi khat chhiarah zawhfel nghal zel a ni ang.

LADC Inthlanpui ah Vote nei 56,873 awmin, Vote 47,769 a tla in, Vote tla hi za zelah 83.99% a ni.

Tun tum LADC Inthlanpui neihah hian M. Kawnpui biala Fangfarlui chu Vote tlak thatna ber niin Vote nei 217 ah 214 in Vote an thlak a, Vote hi 98.62% a tla a, Lawngtlai Chandmary biala Chandmary North-I, Vote 836 awmna ah Vote 594 tlain, Vote tla hi 71.05% niin Polling Station a Vote tlak chhiatna ber a ni.

MDC bial 25 ah Sakeilui bial ah Vote 94.59% tlain Vote tlak thatna ber bial niin, Vote 73.54% tlakna Lawngtlai Chandmary bial chu Vote tlak chhiatna ber a ni thung.

<><><>

## COOPERATION MINISTER

Cooperation Department Minister Pu PC Vanlalruata uapna hnuaihan namin khan National Cooperative Exports Limited (NCEL) leh Mizoram State Cooperative Marketing & Consumers' Federation Limited (MIZOFED)-te chuan thawhona thuthlung Memorandum of Understanding (MoU) an ziaik.

Thawh hona thuthlung hi Mizorama agriculture sector leh a kaihhnawhte'n an thil tharte cooperative sector kaltlanga ram pawna an thawhchhuah theihna tura hmalakna pawimawh tak a ni.

MoU hi MIZOFED Managing Director Pu Lalhrualtuanga leh NCEL Managing Director Pu Unupom Kausik te'n pawl pahnih hotute hriatpuinain an hming an ziahhnan a ni.

Registrar of Cooperative Societies Pu John L.T. Sanga chuan NCEL leh MIZOFED-te thawhdunnain Mizorama cooperative society-te tana tun hmaa la hmuh ngai loh remchanna a kawhhmuh tur thu a sawi a. Cooperation Department Commissioner Pu Udit Prakash Rai chuan he MoU-in an thil tharte ram pawna thawhchhuak theia a siam avanga Mizorama cooperative-te tana hma hun eng a siamsak dan a sawi bawh a ni.

NCEL hi kum 2023 khan Multi-State Cooperative Societies Act, 2002 hnuaihan din niin, India rama cooperative sector thil siamchhuah thawhchhuah kawnga hmahruaitu a ni a. GCMMF (AMUL), IFFCO, KRIBHCO, NAFED leh NCDC te leh cooperative pawl lian dangte hman lar niin, NCEL hi cooperative-te thil siamchhuah ram pawna thawhchhuah lamah a bul atanga a tawp thleng - lakkhawm (procurement), sawngbawl (processing), chhinchhiaha siam (branding) leh zawrhchhuah (marketing) - kalpui tura thuneihna pek a ni.

MIZOFED hi Assam Cooperative Societies Act, 1949 hnuaihan kum 1981 khan din niin, Mizorama cooperative inzawmkhawmna sang ber a ni a. Sawrkar hnuaihan pawl pawimawh tak niin, district zawng zawngah POL, LPG leh mipui mamawh puhruk leh sem hna a thawh a ni.

<><><>

## AIZAWL SUMTUAL

Urban Development & Poverty Alleviation (UD&PA) Minister Pu K. Sapdanga chuan, namin khan Aizawl Smart City Ltd. (ASCL) hmalaknaa din 'Aizawl Sumtual', MINECO hmun ami chu a hawng.

Minister Pu K. Sapdanga chuan mipuite tana lenthawvanna hmun nuam tak 'Aizawl Sumtual' sak zawh a ni chu lawmawm a tih thu leh hetiang hmun ngaihtuahchhuak a, a taka chan tirtu ASCL-te thawhrimna chu fakawm a tih thu a sawi a. Minister chuan kan pi leh pute duhthusam sang ber chu pialrala faisa rin a nih ang khan tunlai thangtharte tan Aizawl Sumtual faisa rin chu thil nuam leh hlimawm tak a nih tur thu a sawi a ni.

'Aizawl Sumtual' hawanna inkhawmah hian ASCL CEO Pu CC. Lalchhuangkima hnen atangin technical report ngaihthlak a ni a. A hmun enkawzuitu tur Mizoram Handloom Industry neitu Pi Lalthazuali hnenah he hunah hian kum 2 chhung atan inremna hlan nghal a ni bawh.

Aizawl Sumtual hi cheng nuai 1012 chuang senga sak niin, hna thawktu (contractor) atan M/S Mizoram Development Agency rawih an ni a, kum 2023 September ni 5, 2023 khan an thawk tan a, kumin November ni 30, 2025 khan zawh fel a ni. He hmun enkawlzui tur hian open tender chhang sang ber Mizoram Handloom Industry, Tanhril Vengpui thlan an ni a, thla tin cheng nuai 3 sing 5 zanga sawmnga panga chu ASCL-ah an chhunglut dawn a. Mipui tan December 15 atangin tlawh theih a ni dawn a ni.

<><><>

**FCS&CA MINISTER**

FCS&CA Minister Pu B. Lalchhanzova chuan thla 3 chhung buhfai a manto a lei a ngai dawn lo tih a sawi a, nikum atanga Buhfai sem bang tihral thin tihtawp a nih tak avangin buhfai quintal sing 5 chuang an hum thei tih a sawi bawk.

Pu B. Lalchhanzova hovin vawiin khan ZPM Media department chuan Mizoramah sorkarna an siam kum hnihna champha pualin Aizawl Press Club-ah chanchinbu mite an kawm a, kum 2 chhunga ZPM kaihhruai sorkar hnuai department hrang hrang hmalakna sawiin heng zingah hian FCS&CA department hmalakna sawiin, Minister chuan nikum 2024 March thla atanga Buhfai sem bang tihral thin tihtawp a nih tak avangin kum khatah buhfai quintal 50,000 chuang, Cheng vaibelchhe 20 chuang an hum theiah an inngai a ti a, tun dinhmuna Mizoram buhfai chhekkhawl a neih that chhan pawh buhfai bo thlau an venhim vangah an ngai tih a sawi a, hetiang zat an hum theih avang hian thla thum chhung, tun thla December thleng hian a man to, Open Market Procurement atangin buhfai an lei thin chu lei ngai lovin an awm theih a rin thu a sawi a, tunah hian buhfai quintal 1,20,000 aia tam stock an nei tih a sawi bawk a ni.

Minister chuan nikum November thla atang khan retailer te lawmman tihpun a ni tih sawiin, buk dik taka mipuiten buhfai an lak theih nan Godown tinah Digital Weighing scale dah vek tura hmalak mek a nih thu leh an dah zawh tep tawh thu a sawi a, Online-a Ration Card siamthar dil theihna pawh peih fel tep a nih thu sawiin hei hi Mizoram bik chauh nilovin, India ram pum intawm a nih avangin duh anga hmanhmawh theih a nih loh thu a sawi bawk a ni. Hei bakah hian Minister chuan ZPM kaihhruai sawrkar Flagship program - MAMB hnuai Thlai Thar lei, Handholding Loan, leh CM Special Package hnuai mipuite tana hamthatna hrang hrang chhawpchuah a ni, a ti bawk.

<><><>

**ABP**

NITI Aayog hnuai Aspirational Block Programme (ABP), "Key Performance Indicators (KPI)" Ngopa Block chhunga Sector pangate hmalakna hrang hrang te chu nimin khan, Saitual District Bawrhsap Dr Lalgura Tlau hovin thlir ho a ni.

Chairman Dr Lalgura Tlau chuan Ngopa Aspirational Block chhunga Department hrang hrangte hmalak tawhnaah lawmthu sawiin theihtawp chhuaha tan la deuh deuh turin a chah a, Aspirational Block Programme chu mipui tam ber te chhawr tangkaina tura hmalakna a a ni, tiin puanzar kawngah pawh theihtawp chuan zel turin kalkhawmte a sawm nghal bawk.

Ngopa Aspirational Block huam chhungah hian khaw sawm pathum (13)awmin kumin June atanga September chhunga Key Performace Indicators (KPI) 39 atanga sector hrang hrang panga (5) te hnathawh leh hmachhawpte thlirhona neih a nih bakah harsatna an tawhte sutkian dan tur sawi hona a ni.

Meeting-ah hian District leh Block Level Official hrang hrangte an tel kim hle.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

ZMC

Zoram Medical College & Hospital post graduate (specialist) a seat 10 chu state quota leh All India quota in seat awm zatve ve ve in an insem.

ZMC&H-a specialist zir theih turte hi subject 5 - Paediatrics (MD), General Surgery (MS), General Medicine (MD), Obstetrics & Gynaecology (MS) leh Anaesthesiology (MD)-ah te seat 2 theuh a ni dawn a, state quota leh All India quota chuan seat awm zatve ve ve hi an insem a, zaa 50 chu Mizoram quota niin, zaa 50 dang chu All India quota a ni dawn thung a ni.

Akashvani Aizawl zawhna chhangin, ZMC&H director Zoramthara Zadeng chuan Mizoram quota seat 5 zing a seat 2- Anaesthesiology (MD) leh General Medicine [MD] chu In-service category niin Mizoram a doctor țang lai te tan a ni a ti a, seat 3 dang-Paediatrics (MD), General Surgery (MS), Obstetrics leh Gynaecology (MS) chu Open Category a ni a, National eligibility cum entrance test (NEET) PG Entrance exam a ti tha Mizote'n an chang thung dawn tih sawiin, Mizoram sorkar Higher & Technical Department kaltlangin lak an ni dawn a ti a, ZMC&H a PG zir tum te hian kumthar January ni 15 atang khian an zawm tan theih a rin thu a sawi a, a bul țanna atan hian department 5 chauh nimahse zawimuangin department dang te pawh hawn belh zel tum a nih thu leh nakkum lamah seat awmzat pawh tih belh tum a ni thu Akashvani Aizawl a hrilh a ni.

<><><>

MINORITY

Union Minister of State for Minority Affairs George Kurian chuan sawrkarin ramchhunga hnam leh sakhawm tlem zawk minority te hamthatna tur scheme tam tak a siam tih a sawi. Nimina Rajya Sabha rorel inkhawmah he thu hi sawiin Pu Kurian-a chuan heng welfare scheme te hi Sikh community te tan pawh siam a ni a ti a. Pradhan Mantri Jan Vikas Karyakram chu Union Ministry of Minority Affairs chuan kalpuiin zirna, hriselna, thiamthil leh hmeichhiate dinhmun chawikan nan he scheme hi hman anih thu a sawi.

<><><>

**PRESIDENT**

President Draupadi Murmu-i chuan vawiinah kut themthiam lama thawk tha te hnenah Handicrafts Award a sem dawn. He hunah hian kum 2023 leh 2024 chhunga handicrafts lama mi hmingthate chawimawina pek a ni dawn a. Sawrkar thuchhuah danin handicrafts lama sulsutu leh mi thiam tak tak ram chhunga handicraft chawinung tu leh tihmasawntute hnenah he rampum huap chawimawina hi pek a ni ang a. Union Minister of Textile Giriraj Singh leh Union Minister of State for Textiles Pabitra Margherita te pawh an tel ang.



**LOK SABHA**

Nimin khan Lok Sabha inkhawmah national song Vande Mataram kum 150 na pualin special discussion neih a ni. He hla hi Bankim Chandra Chatterjee'n kum 1875 a a phuah a ni a. Sawihona bultantu Prime Minister Narendra Modia chuan Vande Mataram thuken chuan ramchhungah chakna leh fuihna mipuite a pek thu leh zalenna sual kawngah a ti chak thar a ni a ti a. National song chuan vawiin thlengin mipuite thilungah thu ala sawi a, an beisei tihhlawhtling turin a la nawr kal reng a ni a ti. Pu Modia chuan vawiina Vande Mataram hlutna hre reng tura sawihona hun tha House Member ten an nei chu vanneihna anih thu sawiin ramchhung mipuite tan pawh malsawmna anih thu a sawi bawk a ni. Pu Modia chuan Vande Mataram kum 150 na chuan hmanlai ram ropuina a kaitho thar leh tih sawiin ram zalenna sual kawngah khan he hla hian nghawng thui tak a neih thu a sawi bawk a ni

